

SAMÞYKKT

fyrir Veiðifélag Blöndu og Svartár.

1. gr.

Félagið heitir Veiðifélag Blöndu og Svartár. Heimili þess og varnarþing er heimili formanns hverju sinni.

2. gr.

Félagið nær til allra jarða sem land eiga að vatnakerfi Blöndu og Svartár, en þær eru:

Í Svínavatnshreppi: 1. Þröm, 2. Auðkúluheiði, 3. Eldjárnsstaðir, 4. Eiðsstaðir, 5. Eiðsstaðir II, 6. Guðlaugsstaðir, 7. Höllustaðir, 8. Höllustaðir II, 9. Syðri-Langamýri, 10. Ytri-Langamýri, 11. Tungunes, 12. Kárastaðir, 13. Ásar, 14. Hamar, 15. Gunnfríðarstaðir, 16. Holtastaðareitur.

Í Torfalækjarhreppi: 1. Smyrlaberg, 2. Grænahlíð, 3. Kagaðarhóll, 4. Kaldakinn, 5. Kaldakinn II, 6. Hjaltabakki.

Blönduósbær.

Í Engihlíðarhreppi: 1. Enni, 2. Breiðavað, 3. Björnólfsstaðir, 4. Ystagil, 5. Miðgil, 6. Engihlíð, 7. Glaumbær, 8. Fremstagil, 9. Geitaskarð, 10. Holtastaðir, 11. Fagranes, 12. Hvammur, 13. Skriðuland, 14. Móberg, 15. Blöndubakki, 16. Litla-Vatnsskarð.

Í Bólstaðarhlíðarhreppi: 1. Strjúgsstaðir, 2. Hólabær, 3. Gunnsteinsstaðir, 4. Auðólfsstaðir, 5. Æsustaðir, 6. Gautsdalur, 7. Mörk, 8. Hvamur, 9. Mjódalur, 10. Þverárdalur, 11. Kálfárdalur, 12. Bólstaðarhlíð, 13. Bólstaðarhlíð II, 14. Bólstaðarhlíð III, 15. Húnaver, 16. Botnsstaðir, 17. Gil, 18. Fjós, 19. Skeggsstaðir, 20. Brattahlíð, 21. Brún, 22. Eiríksstaðir, 23. Bergsstaðir, 24. Torfustaðir, 25. Barkastaðir, 26. Leifsstaðir, 27. Leifsstaðir II, 28. Steinárgerði, 29. Steiná, 30. Steiná II, 31. Steiná III, 32. Hóll, 33. Skottastaðir, 34. Hvammur, 35. Teigakot, 36. Kúfustaðir, 37. Stafn, 38. Fossar, 39. Fossar II, 40. Fossar III, 41. Mælifell, 42. Eyvindarstaðaheiði, 43. Rugludalur, 44. Bollastaðir, 45. Eyvindarstaðir, 46. Austurhlíð, 47. Brandsstaðir, 48. Blöndudalshólar, 49. Brúarhlíð, 50. Finnstunga, 51. Ártún.

3. gr.

Verkefni félagsins eru:

- Viðhalda og efla góða fiskigengd og fiskirækt á félagssvæðinu svo sem með sleppingu seiða, klaki og friðun ef henta þykir.
- Reka alla lax- og silungsveiði í fiskihverfinu með því að selja á leigu stangveiði eða nytja veiðina á annan hátt, samkvæmt landslögum.
- Byggja og halda við veiðihúsum og bæta aðbúnað og aðgengi fyrir veiðimenn.
- Laga farveg til þess að greiða fyrir fiskiför.

4. gr.

Stjórnina skipa fimm menn. Skulu þeir ásamt varamönnum kosnir á aðalfundi til þriggja ára í senn. Formaður er kosinn sérstaklega, en að öðru leyti skiptir stjórnin með sér verkum árlega. Stjórnarmenn ganga úr stjórninni á víxl. Þannig að formaður gengur út eitt árið og tveir stjórnarmenn á ári tvö næstu ár og helst sú röð áfram. Sama regla gildir um varamenn í stjórn.

Stjórnin skal kosin leynilegri kosningu. Enginn atkvæðisbær félagsmaður getur skorast undan kosningu í stjórn, nema lögmæt forföll hamli eða hann hafi verið sex ár í stjórn. Á aðalfundi skal einnig kjósa tvo endurskoðendur til eins árs í senn og einn til vara. Á stjórnarfundum ræður afl atkvæða úrslitum mála.

5. gr.

Stjórnin hefur á hendi allar framkvæmdir félagsins og ber ábyrgð á eignum þess. Henni er heimilt að ráða menn sér til aðstoðar við þau störf í þágu félagsins, sem vinna þarf á hverjum tíma og semur við þá um þóknun.

Formaður er fulltrúi félagsins út á við. Hann hefur umsjón með öllum störfum þess og fjárreiðum.

6. gr.

Óheimilt er öllum að veiða á félagssvæðinu nema með sérstöku leyfi frá þar til bærum aðila. Í leyfinu skal tekið fram um veiðitíma, veiðitæki og með hvaða kjörum leyfið er veitt.

7. gr.

Af andvirði veiðinnar eða veiðileigu greiðist allur sölukostnaður og annar kostnaður sem félagið þarf að hafa. Síðan skal arði af veiði eða veiðileigu skipt niður á félagsmenn samkvæmt arðskrá sem gildir hverju sinni.

8. gr.

Heimilt er aðalfundi að ákveða alfriðun ákveðinna veiðisvæða eitt ár í senn, en samþykki $\frac{2}{3}$ mætttra félagsmanna þarf til þess.

9. gr.

Aðalfund skal halda eigi síðar en í apríl ár hvert og skal hann boðaður með auglýsingu á þann hátt sem lög um lax- og silungsveiði mæla fyrir um. Stjórnin boðar til aukafunda þegar henni þykir ástæða til, eða ef $\frac{1}{4}$ félagsmanna óskar þess skriflega ásamt tilgreindu fundarefni. Fundir eru löglegir, séu þeir löglega boðaðir.

10. gr.

Reikningsár félagsins er almanaksárið. Stjórninni ber að varðveita reikninga félagsins, samþykktir, félagaskrár, arðskrá, fundargerðir og bréf.

11. gr.

Á aðalfundi leggur stjórn félagsins fram endurskoðaða reikninga fyrir síðasta ár, skýrir frá störfum þess á liðnu ári og leggur fram áætlun um starfstilhögun á yfirstandandi ári.

Aðalfundur tekur endanlega ákvörðun um úthlutun arðs, hvernig veiðin skuli rekin, hverju skuli varið til fiskiræktar og fleira er ákvörðun þarf að taka um. Afl atkvæða ræður úrslitum mála á fundum nema öðruvísi sé ákveðið í lögum, svo sem um breytingar á samþykkt eða arðskrá. Þá þarf samþykki $\frac{2}{3}$ félagsmanna. Nú verður breyting á samþykkt eða arðskrá ekki afgreidd vegna ónógrar fundarsóknar, má boða til annars fundar og á þeim fundi ræður afl atkvæða. Nú er ákveðið að breyta samþykkt eða arðskrá, skal þess þá getið í fundarboði. Greiða má atkvæði skriflega enda sé þess þá getið í fundarbók.

12. gr.

Hver félagi hefur eitt atkvæði á fundum og má hann fela öðrum að fara með atkvæði sitt enda sé umboðið skriflegt og þess getið í fundarbók.

13. gr.

Heimilt er félagsmanni að krefjast endurskoðunar á arðskrá félagsins á átta ára fresti.

14. gr.

Eftir því sem ekki er tekið fram í samþykkt þessari um starfsemi félagsins, fer eftir XVI. kafla laga nr. 76/1970, um lax- og silungsveiði.

15. gr.

Samþykkt þessi sem gerð er samkvæmt 52. gr. laga nr. 76/1970, um lax- og silungsveiði, staðfestist hér með til að öðlast gildi og birtist til eftirbreytni öllum þeim sem hlut eiga að máli.

Jafnframt er úr gildi felld eldri samþykkt fyrir Veiðifélag Blöndu og Svartár nr. 173/360.

Landbúnaðarráðuneytinu, 7. apríl 2005.

Guðni Ágústsson.

Atli Már Ingólfsson.